



Linük anema inyakba tulutibaji
vote auyaba lir: Rahul Gandhi

Shakib-i asaya nungi manen tsüngda
Bangladesh-i meyipa oa asayaner



Raj Bhavantenüng Lok Bhavan agi melener

Dimapur, Luchii/December 09 (TYO): Ministry of Home Affairs, Government of India nungi osang aruba ama aser Nagaland indang Angh-i agizükba ama "Raj Bhavan, Nagaland" nüngja "Lok Bhavan, Nagaland" agi melener, ta

Commissioner & Secretary to the Governor of Nagaland, Thavaseelan K, IAS-i sangdong ka nung metetdaksü.

Anungji tang nungi tenzüka Raj Bhavan, Nagaland dang "Lok Bhavan, Nagaland" ta ajatsü, ta sangdong ajanga ashi.

State sorkari NLTP Act shidak mamshitet: DAABAPF

Dimapur, Luchii/December 09 (TYO): Dimapur nung aliba Civil Society Organizations (CSOs) temi State sorkar dang Nagaland Liquor Total Prohibition Act (NLTPA) agientsü asendenshir akhangba dak sendakba nung Dimapur Area Ao Baptist Arogo Pastor's Fellowship (DAABAPF) senden ka December 7, 2025 nü mena sarasadema aser akang akanga NLTP Act shilem kar mesüra ajunga aginentsüba anema nokdaksü teletetba agia liasü.

Parnoki kuli balala nung ajemdaker iba Act ya mapa kuma shidak inyaksü asoshi nüburttem nem angatetdaksütsü pangjema liasü.

NLTP Act ya 1989 küm agizükba sülen kodanga shidakba yimya nung mapa kuma mamshi. State sorkari Act indang Chapter III khenyongi mapa kuma meinyaktet, kong Director of Prohibition, Prohibition Officers, State Level Prohibition Council aser District Level Prohibition Committee shimtsü shia lir, ta DAABAPF ajanga ashi.

Anungji Act ya mapa kuma meinyaktetba ka masü mesüra tamakok ajuruba masü saka State

machinery-i tamakok ajuruba aser sorkar mapa inyaksü, nüburttem, kibong aser nüburttem tarutsü jenjang wazüka ayutsü nüburttemi melaba akumtsüboa amshitsü metemsüba temaitsü lir. Anungji NLTP Act shilem kar mesüra ajunga agientsüba ya teletetba tajung masütsü.

NLTP Act ya Act ka dang masü saka Nagaland tesem ajunga nung Khrista sülen anidaker nübür ajungai shilem agiba, talisa item temenen den raratsü asoshi Tsüngrem tenzüker nisung 125 takum bendanga agüja June 23, 1989 nü 'Ordained Fast unto Death Campaign' tenzüka nungi adokba lir. Iba Act ya khenyongi balaka, tammang madak takok anguba temaitsü, kong mapa shidak aser sashi-sashia inyaksü shia lir, ta DAABAPF-i ashi.

Anungji DAABAPF-i Nagaland nung aliba Khristanpur ajunga dang itemji kanga junga shisadanga NLTP Act agientsü anema ola adoktsü sarasadema ayongzüker. Act ya yimya shidak amshia aser tesashiba nung mapa kuma inyadaksütsü atema sangdongtsü asen Khristanpur mapa lir, ta sangdong ajangasa ashi.

Hornbill Festival Day 9: Nagaland sobaliba tajung maneni sayu

Dimapur, Luchii/December 09 (TYO): 26 buba Hornbill Festival 2025 tenzüker anogo tokunü buba (December 9, 2025) nung nisung jenti aru, koba Unity Plaza, Naga Heritage Village, Kisama, Kohima nung Cultural Show agi anogo tenzüka liasü.

Iba sentong nung host ya Minister, Housing & Mechanical Engineering, P. Bashangmongba Chang aser co-host ya Advisor, Urban Development and Municipal Affairs, Zhaleo Rio liasü, aser sentong akhumdong ama Air Chief Marshal, Amar Preet Singh, PVSM, AVSM, Chief of the Air Staff (CAS), aser Subhash Chandra Mynam, Territory Manager (Retail), Shillong, Bharat Petroleum Corporation Limited liasü.

Mongulbarnü iba sentong nung Phom Cultural Troupe ajanga nokinketer temi takok ngur tsüngsangba Kongshou Hokpo agi shilem agi aser Pochury Cultural Troupe-i par kin puti otsü, yimya balala aser sobaliba indang sayuba tsüngsang ka agi shilem agi.

Sangtam Cultural Troupe

ajanga alu ruzüker tetsür temi tsük asendang atenba Fürü Thsüh Khidong ken aten aser Rengma Cultural Troupe ajanga Pen Kethü ta sür tsük asenba ken ka tena liasü.

Sumi Cultural Troupe-i tatem maka temeim aser tasü tai benjongba tenem ozü indang Aghacho Le ken aten aser Ao Cultural Troup-i temulung uluba, yimya tajung aser kibong akumtsü renema aliba temaitsü nok chira tendangba yimya, Nokjenjentepba sayua liasü.

Tikhir Cultural Troupe-i Tsin Tsüyük tsüngsang agi shilem agi aser Angami Cultural Troup-i sungkum nung jajaba Kere Phita agi shilem agia liasü.

Konyak Cultural Troupe-i Rangme Ashoa-Bih asaya ka sayu aser Kuki Cultural Troupe-i Suhta Lam tsüngsang agi shilem agia liasü.

Maneni Chakhesang Cultural Troupe-i Rütse Li ken aten aser Locha Cultural Troupe-i nokinketer tashi, telungjem aser tanüla sayua Ejan Sharü tsüngsang agi shilem agia liasü.

Irish Deputy Ambassador-i Konyak nunger sobaliba tushi



Deputy Ambassador to India, Raymond Mullen

Dimapur, Luchii/December 09 (TYO): Mongulbarnü Ireland indang Deputy Ambassador to India, Raymond Mullen-i Konyak Heritage Complex nung International Hornbill Festival Mon Edition 2025 tenzüker ananü buba moatsüdang Konyak nunger sobaliba tajung ngua kanga akumtsübor, ta ashi.

Iba sentong nung Mullen ya tongti tesemdang ka ama aden aser MLA & Chairman, District Planning and Development Board (DPDB), Y Mankhao Konyak host ama liasü.

Iba sentong nung Abu Mehta, Advisor to the Chief Minister and Chairman of IDAN; Kupu Shohe, Chairman, NSMDC; Theja Meru, Chairman, TaFMA; Obed Quinker, Chairman, Nagaland Honey Mission; aser Wanphong Konyak, Chairperson, Bio Resource Mission nungertem dena liasü.

Mankhao Konyak-i pela agizükba o jembidang Hornbill Festival Kisama alema oa mungdaksüba atema Chief

Minister, Dr. Neiphiu Rio dang pelaba metetdaksü aser iba benjongmung ya küm nung khen benjong amungba kisung masü saka sobaliba sayuba aser wazüka ayuba, telungjem adokdaksüba aser tourism jenjang ajungketba sapang ka lir ta ashi.

Sorkari alizüng tajung ka tongteta December 1 nü Statehood Day amungdang sobaliba sübosolemtsü indang documentation saya aser sobaliba wazüka aser kumzüka ayutsü atema sobaliba aser osettsüset indang research agitsü, ta pai ashi.

Pai artisans tem dang sustainable livelihoods adokdaksütsü aser lanurtem nem sobaliba angateta, akumtsüboa aser bener aotsü atema maongka agütsütsü ayongzüka liasü. Iba benjongmung ya ajanga sobaliba balala lungjemdaksür aser kati ka tali tajungba nung angateter, ta ashi.

Iba benjongmung ayonger aser nüburttem tenüng nung Abu Metha-i jembidang, tourists aser shilem agir aser talisa tongti

tesemdang dang pelaba lemsatapa liasü.

Naga nunger taginüba ka lir - chichiba tesunep, akumtsübo aser konang - ta ashi aser anüdoklen aliba Naga nungeri national movement aser statehood nung shilem tajung agiba indang lemsatapa liasü. Pai kin ajunga dang anüdoklen district tem nung terenlok mapa nung tetsüngta aliba angatetsü aser parnok ainba nung yariteptsü ajungshi aser telemsa ajanga kin tashi mait kumdaksür ta ashi.

Mehta-isa Mon nung Hornbill Festival ya ano tuluba aser tajungba akumtsü aser anüdoklen region nung iba benjongmung ayongzüka ya grassroots nung maongka aser employment agütsütsü nükjiding nung lir ta ashi.

Iba anogo Department of Art and Culture ajanga "Cultural Connect" omen kübok sobaliba sentong ka ayongzüka Tangnyu, Wanching, Loung, Tamkoang, Chen area, Longchang, Ukha, Sheanghah Chingnyu, Bung, Langmeang, Nokyan nungi cultural troupes aser Phom, Ao aser Tenyimia kin tenüng nung cultural troupes den Wancho Fusion Crew aser Assam nungi troupe kati shilem agia liasü.

Maneni Department of DUDA ajanga Konyak Union den lungjemer "Heritage Challenge" omen kübok Mon jila nung wards 11 tsüngta ar atsütepba ayongzüka liasü.

November ita DONER-i Nagaland atema sen 4,78,27,552 agütsüogo

Dimapur, Luchii/December 09 (TYO): Nagaland nung heritage aser cultural centres, lanur aser saisapong tesemtem, aser sobaliba wazüka yua tourism aser local enterprise temaba jenjangi ajungkettsü nükjiding nung sector balala nung terenlok sentongtem atema Ministry of Development of North Eastern Region (DoNER)-i North Eastern Council (NEC) ajanga November 2025 nung state atema sen 4,78,27,552 agütsüogo.

Mongulbarnü sangdong ajanga ashiba agi, item senotsü agütsüba ya ajanga NEC-i Nagaland nung ki o jen tajungba kumdaksüba, takum aliba jenjang tajungbai ajungketba, sobaliba ajungkettsüba, research aser innovation ajanga terenlok maparen tashi itshiba sayur.

NEC-i ashiba agi project teyari nungya ki o jen, aluyimba aser sendaktepa aliba inyaksangshi, tourism, sobaliba, shisaliok, saisapong, skill development, livelihood promotion and innovation amala tongtipang sectors tem awajemer.

Parnoki Nagaland nung November ita projects tongtipang ana renemba indang shia lir - March 9, 2023 nung Fire Safety and Skill Training Centre asoshi

Rain Water Reservoir atema sen 381.795 lakh sanction asü. Iba nungya Dimapur (Assam arütsü) nung rainwater-harvesting reservoirs, Khuzama (Manipur arütsü) nung fire-fighting operations atema tzü peria angutsüba atema alitsü.

Dimapur Central, Dimapur West, Khuzama aser Chiechama fire stations nung reservoirs tali yangluba ajanga ajungben lendong mapang teyari agütsütsü asoshi tashi itshitsü imlar.

Project nungya Skill Training Centre, Chiechama nung residential quarters, barracks, kitchens, classrooms, drill shed, office space aser asayadak moapu ka dena lir.

November ita renemba rongnung Sovima village, Chümoukedima nung sen 4.48 crore agi Bamboo-based Craft Concentration Centre ka yangluba dena lir. Iba centre ya bamboo artisans atema facility ka ama alitsü, kong akhi mapang sung agi yanglua amshiba osettsüset rizünga ayutsü atema craft eco-museum ka alitsü craft design lab aser natural dyeing & weaving facilities alitsü.

Item tejangja projects dak alia NEC-i November nung Northeast nung aliba states ti atema sen 56,22,37,739

agütsüogo, aser sobaliba benjongbentsü, seminars, research aser danga inyaksangshi nunga yariteper.

Ano Viksit Bharat 2047 kübok Purvottar Hindi Samagam, Lamka Youth Summit, North East Riders' Meet, climate sustainability indang workshops, multilingual dictionary development, AI and ML applications, aser sectoral conclaves atema central agencies aser cultural bodies balala nem sen 14,89,90,034 agütsüogo ta council-i ashi.

Item maparen ya timba North Eastern Region Community Resource Management Society (NERCRMS), North Eastern Development Finance Corporation (NEDFi), CSIR-North East Institute of Science & Technology (CSIR-NEIST), Education & Research Network (ERNET), North Eastern Handicrafts & Handlooms Development Corporation Ltd. (NEHHDC), Indian Council for Cultural Relations (ICCR), North Eastern Regional Agricultural Marketing Corporation Ltd. (NERAMAC) aser North East nung aliba universities balala ajanga mapa kuma inyak, ta NEC ajanga ashi.



TIR YIMYIM YIMOBILEM (EDITRIAL)

DIMAPUR WEDNESDAY, DECEMBER (LUCHII) 10, 2025

Agütsüba mapang

Khristmas mapang ya agütsüba mapang lir. Tsüngremi asenok temenen nung mesamadaktsünü meimyong Pai Pa chir Yisu Khrista asenok menen alangzüksü asoshi angati agütsü. Iba Yisu Khrista temeim asenoki memetetdang asenoki külema aliba menen mojing tsüngrem nema asenoki temoatsü aser taneptsü meshia shiruru taküm tenla agüja aru. Ibaji asenok asoshi tsüngrem nem tenla agütsüba tulutiba liasü. Ajisüaka, shitakba anüng aser alima yanglusang Yehovah Tsüngrem, tsüngremtem madak Tsüngremibo asenok menen alangzüksü asoshi Pa chir ka dang aliba iba jabasoji tepseta asenok menen alangzüksü asoshi angati agütsü. Iba temeim sempet agütsübaji koda tulu ta bilemdangtsü mapangbaji tang Khristmas mapangba ya lir. Atangji Khristmas mapang ya agütsüba mapang lir. Kodang anüdoklen nungi tashitemetetertemi Yisu asoba osang angashia Yirusalem tashi bushia aru, parnoki Yihuda nunger chuba ka soa aliba nemji parnok akaba ajak agüja külemnüa liasü. Anungji, parnoki ano Yirusalem nungi Bethlehem tashiji oagi tanur soa alibaji bushi aser kodang parnoki tetsür Mari den tanurji angu, Mathi :2:11 nung ashir, " idangji parnoki apudaka pa külem aser parnoki senti osetlep salar pa nem hon, liangmesen aser teronem menemba sempettem agütsü." Yisu asoba yimjibo tilaka dang aser kijia tamajung nashi ki ka dang, saka pa nem sempet agütsürtemjibo tashitemetetter aser parnoki agütsüba sempetji hon aser teronem menemba senti osettem liasü. Aji oda, kodang Yisu tain aküm aser alima nung tebui tenyaba mapa inyaksü tenzük, pai nisungtem nem tanüla tekümtet dang masü saka shi nunga taneptsü aser tebok asüngtsü asoshia chiyongtsü agütsü. Aji oda, Yisu alimai aruba anogo nungi tenzük pa kangkidong nung asenok menen alangzüksü asoshi pei taküm bendanga agüja angenlokda tsüba anogo tashiji angati temeim agi agütsüba mapatem agi sünga lir. Asenok tanüla tekümtet angubajibo yutsür, angati temeim masü asü nungbo, tasodang nungi tenük poker aliba nisung ka aneptsüba mesüra nisung tasü nungi shia arudaktsüba taaji sen kwi jenjang süla ta kanga süngmangseta bilemer. Angati temeim agi magütsü nungbo nisung meyi pongo dak tali chiyongda tsüba sen to kwi süla ta alima shi tsütsü kija nungia kanga pelaa bilemer. Khristmas mapangji ibaji lir. Aji oda, asenok aibelenba atema angati taidok agütsür külenang ano angati kotak nung alitsü renemtsüba temeimji kechi den asenoki medemdangtettsü. Khristmas-i asenok nem iba tekümtet aser tangatetbaji bener aruja lir. Anungji, Yisu sür shia arua kotaki tuli, tenyartem mapang kodang limapurtem Khristan aküm, parnok ajak kanga tagütsünü aküm, anungji parnoki pei akaba ajak yokdoker iba senji külem nüngdak asoshi amshitsü atema tenyartem nem agütsü ta Tenyar mapa 4:34 nung shia angutsü. Nisung tsütsü bilemdangra, ibaji tesüngmangtsü ka lir, saka Khristmas ajanga nisung nem pei akaba ajak külem meyong akümtsü aser pei akaba agi lemsateptsü asoshi tangatetba agütsü. Tanüa asenok Khristan purtem aikati yamaji inyaker. Nisung aikati Christmas mapang pei akaba nübortem den lemsateper, sensakertem - mekokmeinertem yarir, taidok agütsür aser adianu aser pur medemertem den tesendaktep akangshir. Ibaji Khristmas lir. Temeim, teyari, taidok agütsüba medeniang Khristmasji asenoki jangratema memongtettsü. Aji oda, Khristmas jangratema amongtsü asoshi Yisui asenok koba ama meim, yamaji asenoka kati ka den meimtepdi aser Yisui asenok dang taidok agütsüba ama asenoki taidok agütsüdi. Khristmas ya kodanga aibelen mesüdanger aser temeshi purtem atema menügdaker saka aibelen alir temenen purtem atema kanga nüngdaker. Arung, temenen purtem aser tashi mangartem, takümbo asenoka Khristmas ya jangratema mongdi, kechiyong Khristmas ya temeshi purtem asoshi masü saka temenen purtem atema aru. Ibaji temenen purtemi mangatetra ano asenoksa kanga akoksaktsü. Iba tangatetba nung Khristmas amongtsü ayongzüker.

OLEMSABANG

DIMAPUR AREA AOR ORDAINED MINISTER FELLOWSHIP OLA

~ Rev. Dr. Kari Longchar, Tayonger &
Rev. C. Walu Walling, Tezülur

Laishiba nung yi ajemba timtem indang aika shia lir, saka item rongnung tongmelang agi yangi lai tekong kar lemsateper. Kodang Noahi yi ajem, pa mesepatok aser pei süki nung mangsa ontaka liasü (Api. 23.21). Tatem nung yagi peri ama meteper, aser mim peri ama mechir (Api. 23.32). Aser yi koba nung teraratsü lir aji agi temesepma, saka tanela agi sünga liang (Efe. 5.18).

Naga nujiso tenzükba mapang Govt. of India- i Naga lima dangi Yimden Yi (Political Rum) ta ser talubosa yok. Anungji NBCC-I February 5, 1962 Mokokchung nung senden alidang iba political Rum yoktsü melenji nübur asoshi mapa tajung ang ka melen ainyakang ta mepishi. Yongji aji anen.

Naga nunger Statehood ngur külen 1964 nung NBCC-i Kennet Kerho, Rev. Ayutemjen aser Rev. Longri Ao lenisüba nung Nagaland sorkar dang yi ayokba ya anenjang ta ashi. Saka sorkari yi ayoktsü temelaba (license) tali ang agütsü aser yi ayokdak district ajak nung teimba lapok. Anungji October 2, 1966 küm NBCC-I Chief Minister aser pa kübok Ministertem dang yi ayokba temelaba (licenses) agientsü aser yi dokan ajak shibangjang ta ashi. Saka sorkari hai ta langzük, saka ano meyiper Nagaland sorkari yi yanglutsü, ayoktsü ang ozüng yanglu. Aji 1967 küm (the Nagaland Excise Act 1967 to manufacture, sell and use more liquor) yanglu.

Anungji 1967 küm NBCC Women Dept. ajanga Nagaland Women Union (NBWU)yi tongpang tesashi raratsü tenzük. Yongji 1969 NBCC ajanga The Nagaland Central Committee on Liquor Prohibition Feb. 3, 1971 nu tentet aser sorkar dang lense ajak katitsü aser yi shishilemba dak ajak küm 3 tsüngda nung shibangtsü aser 1973 küm nungi yi nokdangtsü mepishi. Nagaland sorkari haihaura asü, saka tesüngmangtsüka parnoki nangzükbato meyiper 1974 Nagaland Excise Rules benok, aser Nagalima nung yi ayoktsü jenjang agütsü.

Iba sülen ano November 28, 1984 nunga NBCC-i mepishi nung asen lenir S.C Jamir Nagaland Chief Minister aliba mapang Cabinet nung mapang agia lemteper tang agüja aliba yi ayoktsü temelabaji 31/3/1985 tashi melatsü, iba sülen temelabaji renew memelatsü aser yi ayokbaji anendaktsütsü ta zülu nung agütsü, saka sorkari tenangzüka ama meinyak.

Anungji süaka mesüra taküm liaka lokti nongzü sentong (mass movement) tulu jazüka October 25-27, küm NBCC Pfutseru telemtetba nung ajemdaker Lokti Senden tulu jazüka yi anema sentong tulu agi aser arogo lenirtem 5000-i temai küli mesür (memorandum) ka Nagaland Angh nem agütsü. Iba mapang ya Angh-i yimsü asüba mapang liasü Angh-i lokti teyongyaba aser taginüba haihaura aser takangba agütsütsü ta nangzük.

Aji od alia aodang October 1, 1988 anogo Mon District nung yi khentongi mamshitsü sangdong. Iba sülen Mokokchung nung January 3, 1989 anogo nung yi tasazük makai lumitsü (indefinite Hunger strike) tenzük. Aji oda January 4, 1989 nu Deputy Commissioner V.N. Gaur-i Mokokchung District nung yi khenyongi mamshitsü sangdong.

Iba sülen 1989 küm tongpang tesashiba raratsü tenzük. Kohima yimtiba nung NBCC ajanga March 15, 1989 nungyi khenyongi mamshitsü sangdong agüjang ta Nagaland sorkar dang mepishi. Telangzüba tajung tasazük makai lumitsü magütsüra March 17, 1989 nungi tenzüktsü ta ashi. Saka state sorkari telangzüba kecha magütsü nung March 17-20, 1989 Khristar sepia 5000 adenshia lumia yi anema sentong agimeso. Anungji Nagaland sorkari anogo 60 meshizük. Anogo 60 abensar ano anogo 40 meshilok. Saka sorkari tasa tamajung asar ta metet nung lumi sentong maneni aotsü arogo nung lenirtem jatep.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Israel pusemtsü atema Pastor 1,000 commission süogo



Amongnü (December 7) Olive tenem nung Israel pusemtsü atema pastor 1,000 commission asüba sentong nung tangokba noksa nung angur.

Jerusalem, Luchii/ December 09 (Agencies): December 1 nungi tenzüka December 6 tashi pastor 1,000-i Israel nung tesem balala sema senzüba sülen Amongnü (December 7) tang mezüng Israel nung Ambassador's Summit ayongzüka agiogo.

Iba summit nungji Israel pusemtsü aser Yihuda nung sempaba anema inyaksü atema Israel-i pastor 1,000 dak tali commission süogo.

Pastor 1,000 dak tali commission asüba sentong nung jembidang U.S. Ambassador to Israel, Mike Huckabee-i, "Nenok ya Israel atema ambassadors masü. Yimtenren nung shilem agitsü atema shingaia nenok dang masüngdanger. Atangji ni-a yamaji inyaksü mashir. Nenok pastor inyakba kija nunga khuret lir, anungji yimtenren nungbo majemoktsüla. Ajisüaka nenok ya Khrista atema, Pa yimli aser Pa O atema Ambassador lir," ta ashi.

Taoba mapang Gaza Humanitarian Foundation nung director, Rev. Johnnie Moore-i, "Iba ya pastor army tem lir, pastor meyirjang ka

Tang mezüng pastor tem telok tulutibai Israel semdangogo aser ibaji nükjidong ka nung semdangba lir- Yihuda linük aser Israel nung pusemtsü atema lir," ta ashi.

Osangbenertem den jembidang Rev. Moore-i, "Putu ajak nung tetendangba kaka lir, ta ni bilemer. Putu ka nung Yihuda nungertem (tepseltsü atema) train nung Auschwitz-i anir ao aser putu ka nung Soviet Union nung Yihuda nungertemi teyari meshia ayimdena liasü. Asen putu mapang nung school tem aser lenmangtem nung Yihuda nung sempaba ajangshir. US nung yamaji majangshidangba Yihuda nung ka danga mali," ta ashi.

Israel Ato kilonser Benjamin Netanyahu densema Israel nung lenirtemi pastor tem dangji tasü itta inyaksü ajungshiba den külemi Yihuda nung pusemba atema pelaba lemsatep.

Netanyahu-i pastor tem dang, "Nokdakang aser ochi jembidang. Lanurtem den jembidang. Ni nenok dak imlar aser nenoki nenok teinyaksü mapa inyaksü ta ni amanger,"

ta ashi.

Taoba mapang Jerusalem nung Deputy Mayor, Fleur Hassan-Hahoum-i, "Atangji tang asenok den pastor tem meyirjang ka aliba ya US tesem balala nung aliba Arogotem nungi lir. Asenok dang temeim sayua parnok yagi aru. Iba tetetzü asenok ya asen kija masü," ta ashi.

Yihuda nung pusemtsü aser Yihuda nung sempaba anema inyaksü atema taruba küm asem tsüngda ano pastor 10,000 dak tali ayongdentsü nükjidong lir.

Pastor temi hopta ka jungnüa Israel semdangba mapang nung tesem balala semdangogo aser tesüsa Olive tenem nungi pastor temi Yirusalem nung yimjung atema sarasademja liasü.

Christian Harvest International nungi Rebecca Greenwood-i, "Pastor tem 1000 ji parnok tsüngda-a aika memetep. Pai onok ayongmeso aser onoki Kibubai ashiba oji tashi angaa liasü. Iba mongpu ya Israel nung sempaba tamakok ngudaktsütsü aser Tsüngremi shimtetba nüburtam matsüngdang Pa sentsüwanghi angutsü mongpu ka," ta ashi.

Colombia nung Arogo lenir 8 tepsetba video ka ajanga jangjaago

December 09, 2025: Colombia nung Arogo lenir 8 tepsetba tawa mobile phone nung aliba video ka ajanga jangjaago, ta Khristan melungtet telok Christian Solidarity Worldwide (CSW)-i metetdaksü.

Taküm April ita nung kiralongrar telok kati Arogo nung lenir ti khaseta liasü. Arogo nung lenirtem khasetertemji Columbia nung telungpur telok tulutiba, Revolutionary Armed Forces of Colombia (FARC) lir ta bilemer.

Arogo nung lenirtem

dangji asüngdangyaa liasü, noksa tangok aser lisü agi alener Calamar Municipality kübok kanga tezülen aliba tesem kati anir aoba sülen khaset.

July ita nung Colombian Attorney General's Office-i arem nung leper ka nung nisung aika rema aliba anguba ajanga Arogo nung lenirtem asübaji jangjaa liasü.

Taoba ita court-i iba video ji FARC den tesendaktep alir nisung ka tenüng agi, Excehomo Pabón Amaya indang phone nung anguba sülen court-i maneni

bushisüngdangtsü tuyuogo.

CSW otongdar, Anna Lee Stangl-i, "Iba tatalokba ken o nung nisung ka apuba osang angashia pelar, ajisüaka aibelener ajak mapu tashi sorkari maneni bushisüngdangtsüla," ta metetdaksü.

Iba linük nung Arogo aser Khristan lenirtem anema inyakba kanga bulua ataloker. November ita nung sorkar lenirtemi Arogo nung lenirtem ajurua tesüiba mapangtem nung Khristantem anema inyakba ken otem bentettsü atema jembia liasü.

ANOGO ABEN TSÜNGREM DEN

Ne Tanishir Anidakang T. Ken 25: 8- 15

Idaki Dawidi Tsüngremi len aniba indang jembir. Pai aniba jembia aruogo. Pai maneni anir asü? Asenoki taküm asoshi Pa sentong kar asü? Pai asenok koda anir? Dawidi Tsüngremi aniba agizüktsü tongmelang agi kar agütsür.

Asenoki ajemalua tenzüksüla. "Pai ajemalur temeten leman nung anir; aser ajemalur dang Pai leman sayur"(9). Ajemalu tetezü asenoki Tsüngrem dang Pai kechi asütsüla aji mashir; Pa nem asenoki tsüangi o magütsür. Pa Tsüngir shiba asütsü akok? Ajemaluri Tsüngrem O agizüker aser Pai Mulungba nung bendanga agütsür. "Shiri Kibuba tezüngzüktepba aser kuli benshir parnok asoshi Kibuba leman ajak yimlibilem aser ochi lir"(t.10). Yongyamarar dangi Tsüngremi Pai mulungba jungkai madoktsür. Shirnoki tashi angar parnok dangi Pai mulungba jungkai adoktsür. Iba melen, Pa peladaktsüba taküm ka na asütsü.

Kibuba dang ochi süa aliba nung Pa sentsüwangshi, Pai mulungba aser taochi indang bilemba dena lir. Ne mapa aser o agi Tsüngrem sentsüwangshidaktsür asü? Pai mulungba nung na alir asü? Pa taochi nung nai yimlar asü? Ne taküm agi Kibuba sentsüwangshidakjang.

Laishiba lema agütsübaji ozüng alema masü: Allahabad High Court

December 09, 2025: liasü.

Allahabad High Court-i, 2024 küm India nung Laishiba lema agütsüba aser Khistantem anema inyakba tamangba yimsü sayutsüngibaji Uttar Pradesh Prohibition of Unlawful Conversion of Religion Act, 2021 kübok ozüng alema inyakba aibelen ka masü, ta metetdaksüogo.

Uttar Pradesh kübok Sultanpur district nung aliba Police Station ka nung Ram Kewal Bharti aser tangartem anema ken o benokba sülen parnoki court nem temepishiba ken o agüja liasü. Ajioda November 28 nü iba ken o angadangba mapang nung Justice Abdul Moin aser Justice Babita Rani nati akümba division bench-i, Laishiba lema agütsübaji anti conversion ozüng alema masü, ta oshidang agütsü.

Taküm August 17 nü Manoj Kumar Singh ta ser nisung kati, Ram Kewal Bharti aser tangartemi Dalit nungertem aser sensakertem Khristan yimsü dangi meypdaksütsü atema sarasadem sentong ka ayongzüka liasü, ta tai tonglokja police station nung parnok anema ken o benoka liasü.

Singh-isa, pai Bharti'er kima LED screen ka angu aser iba tesem nungji parnoki Khristan yimsü indang sayutsüngiba den külemi Laishiba lema agütsür, ta metetdakja liasü.

Yaküm January ita nungi September ita tashi nung UP nung anti conversion ozüng kübok pastor 30 dak tali pua

Forum-i metetdaksü.

Allahabad High Court-i, Singh-i August 17 nü FIR benok saka Khristan yimsü dangi meypdaksüba kuli agütsür ka danga maliasü.

Singh-i kuli agütsüba ajak agi LED screen ka aser Laishiba anguba dang liasü, ajisüaka kasa anogo nungjisa Bharti den tangartem apu.

Allahabad High Court-i, Uttar Pradesh Prohibition of Unlawful Conversion of Religion Act, 2021 kübok Arrla 3 ajanga tashiyim amshia mesüra mesüzüka tamangba yimsü meypdaksüba nokdanger, anungji nisung karibo 'kangshia ni tanga yimsü dangi meypdaksüogo' ta kuli ashitsü nüngdak, ta metetdaksü.

UP nung anti conversion ozüng ano tesashiba yangluba sülen Khristantem nem tai tonglokja apuba aser tekülem sentong tagidak mapang nung timtem agütsüba kanga bulua kümogo.

Allahabad High Court-i Singh na dang counter affidavit hopta pezü tsüngda agüjang ta tuyu aser aser temepishiba ken o agütsürtem dang hopta ana tsüngda telangzüba agüjang ta tuyu.

AO OSHI ANGAZÜKDAK:**TANÜ ANGAZÜKTSÜBA OJANG****Tsüla**


(n) techanu memepui aliba shiruru tetsü (young female animal)

* Nashi tsüla tajung ka Subongba'er kima sentaka liasü.

Tsüngdenchiok

(n) tepuodak ayuba (prison, jail)

* Alima nung özüng raksar melira, tsüngdenchiok dak menügdaktsü.

OLONG PAITEP # 7355**TIPLÉN**

2. Sü jeplok
4. O agi merenshi
7. Ayongküüm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

-

(4)

-

(5)

-

(5)

-

(4)

-

(9)

-

(4)

-

(5)

-

(5)

-

(4)

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda jatepba

-

(4)

-

(6)

-

(5)

-

(5)

-

(6)

-

(5)

-

(4)

OLONG PAITEP # 7354 TELANGZÜBA**TIPLÉN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.



Hornbill Esports Festival 2025 nung Team Autobotz BGMI champions kümogo. Iba asayamung ya Esports Association of Nagaland (ESAN) aser Department of Youth Resources and Sports na longjemer ayongzüka asaya liasü. Team Autobotz nungi Lobster nem Most Valuable Player (MVP) agüja liasü. West Bengal nungi TSN Esports runners-up aser Manipur nungi SEG Esports tasembuba jenjang nung liasü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Manipur nung UNLF-P züngsem ana apu

Imphal, Luchii/December 9 (Agencies): Central security forces aser Manipur Police Commandos na longjemer Pambei-i aniba United National Liberation Front (UNLF-P) züngsem ana puogo. Iba telok ya tang centre aser state sorkar naprongla den tenangzüktepba yanglur lir.

Source balala nungi osang angazükba sülen telungpur ana ya Imphal West district nung Sekmai Police Station kübok Keystone Infra Pvt. Ltd., Awang Wabagai nung apu, ta police-i Mongolbarnü metetdaksü.

Sepaitemi apuba telungpur ana ya Imphal East district kübok Soibam Leikai Ayangpalli Road nung alir Ningthoujam Nongpoknganba Meitei (31) aser Imphal West district kübok Lambal Sabal Leikai nung alir Konthoujam Nelson Singh ta jangjaogo.

Tena ket nungi ngutetba osettem rongnung four-wheeler (Maruti Swift) ka, mobile phone pezü, yangku ka aser ID card ana densema liasü.

Police osang ajanga ashiba agi, telungpur ana ya taoba hopta ishika Imphal West district kübok north len tesem kar nung rakzükrakdema senzua liasü. Ketdangsürtemi parnoki apuba telungpur ana den tena ket nungi ngutetba osettem ken o dak sendaka aliba police station nem bendanga agütsüogo.

Lenden nung amendaker aliba Meitei militant organisation UNLF-P puri 2023 küm November 29 nü India aser Manipur sorkar den tenangzüktepba ka yanglua liasü.

UNLF ya 1964 küm ngutet aser Manipur nung Meitei nunger telungpur teloktem rongnung ajaki jangja aliba telok ka lir.


Mizoram nung sen crore 318 alang temesepba mozü puogo: Minister

Aizawl, Luchii/December 9 (Agencies): Mizoram nung taoba küm ana tsüngda sen crore 318 alang temesepba mozü balala aser Burma nungi shibelener aruba kozü sen crore 35 alang puogo, ta minister kati Hombarnü metetdaksü.

Chief Minister Lalduhoma-i anir Zoram People's Movement (ZPM) party-i 2023 küm December 8 nü sorkar kümte aser Hombarnü küm ana jungogo.

Sorkar takoktem indang jembiba mapang State Information and Public Relations Minister B. Lalchhazova-i osangbenertem dang ashiba agi, kasa mapang tsüngda prangbong 54 aser injang 28,005 pua liasü.

Pai ashiba agi, temesepba mozü balala rongnung local

**2026 matongdang Tipra Motha district council nungi tugutsü: BJP**

Agartala, Luchii/December 9 (Agencies): Tripura BJP Janajati Morcha lenir aser BJP state secretary Bipin Debbarma-i ashiba agi, Tipra Motha Party (TMP) tashi ajema kümdar. Paisa, TMP ya 2026 küm Tripura Tribal Areas Autonomous District Council (TTAADAC) nungi tugatoktsü.

Agartala nung osangbenertem den sensaksemba mapang Debbarma-i iba olen lemsatapa liasü. BJP Vice President Bimal Chakma-ia iba sentong nung shilem agia liasü.

Pai ashiba agi, TMP pur jenjang mejungi akümba sülen tawa BJP kübok inyaktertem tali amak tenzüko. Paisa, BJP züngsemtem aiben amakba atema Tipra Motha kübok inyaktertem aitsüogo.

Debbarma-isa, December 13 nü Agartala kübok Rabindra Bhavan jakdang rally tulu ka ayongzüka agitsü ta sangdongogo. Iba sentong ya BJP Janajati Morcha-i

ayongzüka agitsü.

Pai ashiba agi, district balala nungi tribal tem meyirejang aika BJP nung adentsü. Paisa, iba sentong nung district ajak nungi tribal 5000 dak temai shilem agitsü ta ashi.

Iba sentong kecha tetsükdaktsü makai agitsü atema party-i mandal shia observers kaka shimogo, ta paisa shisem.

Debbarma-i, iba sentong ajanga tribal temi BJP ya Tripura nung tongtibang party ka ta agizükba sayur, ta ashi.

"District council nung opposition ama onoki onok shilem agidar. Parnok onok den longjemer lir saka parnoki onok sentongtem nokdang. Onoki rally aser senden amentsü atema parnok kodanga menokdang. Iba ya democracy lir," ta pai ashi.

Paisa, TMP puri 2026 council elections nung tamakok angutsü tsüba bilemer ta ashi. Debbarma-i ashiba agi, Tipra Motha pur tenüng makai kümdar.

shishilembadak sen crore 318.29 alang heroin aser methamphetamine densema liasü aser iba den sen crore 35.03 alang kozü law enforcement agency temi taoba küm ana tsüngda puogo.

Lalchhazova-isa, sorkari süngmok quintal 338,35.82 alizükogo aser aluyimertem nem state indang flagship programme, 'Bana Kaih' mesüra Handholding Scheme kübok support price ama sen crore 137.72 agütsüogo. Sorkarisa aluyimertem ket nungi sen crore 2 shi alang kioktsü quintal 48,602.29 aser sen lakh 44.18 alang tsük quintals 1,473 alizükogo, ta pai ashi.

Paisa, Handholding Scheme kübok mezügbuba shilem nung loan agizüktsü atema beneficiary 702 shim aser iba

flagship scheme kübok CM Special Packages nungi tangar 2,258 nem senotsü teyari agütsüogo.

Taoba küm ana tsüngda beneficiary 36,789-i Pradhan Mantri Awas Yojana - Urban (PMAY-U) scheme kübok ki asütsü atema teyari agizükogo, ta pai ashi.

Lalchhazova-i ashiba agi, Serchhip district kübok Thenzawl nung yimjung yimti ka amenoktsü atema jenjang agiogo aser iba atema Ministry of Housing and Urban Affairs-i sen crore 10 lemsüktsüogo.

Mizoram Universal Health Care Scheme kübok beneficiary 54,261 angati temang anepalutsüogo aser sorkari sen crore 84 tashi medical reimbursements agütsüogo, ta pai shisem.

Pakistan sorkar & mitkari Imran Khan anema ken o tesen benoktsü jembir

Islamabad, Luchii/December 09 (Agencies): Pakistan yimten yimsüsür aser security establishment ajanga taoba ato kilonser Imran Khan anema linük ashiochtsüba ken o benoktsü aser par Pakistan Tehreek-e-Insaf (PTI) party nokdangtsü atema kanga sashia jembishinü sütar ta osang ajanga ashi.

Osang ajanga ashiba agi Ato Kilonser Shehbaz Sharif kübok federal sorkari mitkar lenirtemi Khan inyakyim aika nung 'red lines' alemogo ta amanger - aser item rongnung Pakistan indang linük balala den tesendaktep mejungi kumdakja national security raksatsüba dena lir.

Imran Khan ya ato kilonser ama inyakdanga lir asünung, nuclear dak sendakba osangtsüsang aser sorkar indang miim inyakyim densema Pakistan indang kangasa tongtipang 'assets' tem meteta lir ta ketdangsür temi bilemer, ta osang ajanga ashi.

Pa yimten yimsüsüba tsütsü tashi mangaba, sorkar kongdang balala den toktepba aser miim inyakyim meteta aliba ajanga Pakistan ya jenjang temesü ka nung yutsütsü ta parnoki bilemer.

Item ajanga sorkar ketdangsürtem tebilemtsü tuluba kumdaktsür aser linük ashiochtsüba ken o benoktsü indang jembishinü akar ta ashi. Khan-i Tehreek-e-Taliban

Pakistan (TTP) aser Afghan Taliban dang temeim sayur ta tai tonglokja aliba ajanga sorkar anisüngzük monguteter ta osang ajanga ashi. Taoba PTI sorkar indang policy nung TTP telungpur Pakistan nung arua alitsü inyakyim temelaba kumdaktsü aser iba ya ajanga tanü kiralongra kanga sashia akumba den sendaktepa lir aser iba yongji sepai aser civilian aika asür ta parnoki ashir. Khan anema ken o bendentsü merangba nung item tai tongloktsüba ya tongshi tiyong amai kumdaktsür.

Linük balala den tesendaktep mejungi akumba indanga jembir. Khan kümsük mapang United States, China aser Saudi Arabia den Islamabad tesendaktep kanga jangja tamajungba akum ta sorkar inyakyim meteta alir kasa nisungi ashi.

Khan-i yimjak nung "cipher" ajanga pa ato kilonser menden nungi atsüngdokba ya US tasa lir ta aitsüba ajanga Washington ain adokdaktsü, aser pa indang sorkari China nunger investors tem CPEC projects nung ochimashi mapa inyakba nung dena lir ta jembiba ajanga Beijing den tesendaktep mejungi akum.

Iba mesük pai Saudi Arabia nungi senotsü teyari tali meshiba den Saudi lenirtem anema o meshidak jembiba ya Riyadh nung mezüngmeshi ama

repranger. Item inyakyim yagi Pakistan indang foreign policy environment raksatsü aser tang sorkar tim atemer, ta ketdangsür temi ashir.

Kasa mapang PTI indang 'political messaging' ajanga mitkar tali meinpronger. Osang ajanga ashiba agi, PTI lenirtem aser Khyber Pakhtunkhwa nung provincial ketdangsür temi federal ketdangsür aser security institutions den amalitep akatsü memulung aser party lenirtemi nüburtem longkak aittsü aser mepetmesü adokdaktsütsü maneni meranger. Mitkar temi iba ya asaa mepetmesü adokdaktsütsü merangba ama züngshir.

Hokulbarnü ISPR Director General Lt Gen Ahmed Sharif-i Imran Khan tekolok manemi lir aser pa yimya ya "serious national security threat" lir ta sangdongba ajanga tensa tamajungba akum.

Iba ama yimjak nung artsüba den Khan'er kibongi tashi mangaba - shirnoki Pakistan sorkar tenüng menüksütsü Indian media amshir ta tai tongloktsüba - ajanga mera tesashi agütsü tejangja ta ajiteter.

Sorkar osang ajanga ashiba agi, Imran Khan, par party lenir aser kinunger temi state institutions anema maneni nokdakra, timtem tulu asütsü aser linük ashiochtsüba ken o benoktsü aser PTI shibangtsü indang jembitsü.

Israel-i asendenshir tayimtsü amshia Lebanon amak

Beirut, Luchii/December 09 (Agencies): Israel mitkari tayimtsü amshia southern Lebanon amakba ajanga ki aika raksatsü, ta Lebanese state media ajanga ashir, kong Israel-i taoba küm Hezbollah den ceasefire yanglua aliba nung tanen makai aibelenba ajanga tali ain adokteper.

Lebanon indang National News Agency ajanga Hombar aonung menur ashiba agi, Israel indang jets temi Mount Safi, Jbaa jila, Zefta Valley aser Azza aser Rumin Arki tsüngta tesemtem nung ishiben amak.

Tang tashi nisung asü-amaba osangbo mali.

Israel mitkari X nung post ka agütsüba nung parnoki Hezbollah indang elite Radwan Force-i amshiba special operations training compound ka densema Hezbollah den sendaktepa aliba tesem kar amak, ta ashi.

Ki kar den rocket khaloktsüba tesem ka nung kongshia amak ta mitkari ashi.

Israel aser Lebanon nati ceasefire ketdangsütsü nungloktsüba military committee dangi civilian envoys tem yoker anogo ishika lir iba ya ataloker. Envoy yokba ya United States-i ita aika khanga arua liasü, aser linük ana dang jembishinü ulushitsü ajungshir.

Hokulbarnü Lebanon Tir Joseph Aoun-i Israel den

jembishinü akatsü lenmang amshitar aser Israel-i ozü linük nung maneni amakba anendaktsütsü nükjidong nung jembishinütsü ta ashi.

Tang aliba ceasefire ya Washington tetsüngtai ia 2024 küm yanglu aser iba ya ajanga Israel aser Hezbollah tsüngta küm ka dak tali raraba tembanga liasü.

Ajisüaka Israel-i anogoshi ama Lebanon dak maneni amaker.

November ita United Nations report ka sangdongba nung ceasefire tenzüker Lebanon nung tanurtem densema civilian 127 tepsetogo ta ashi. Israel-i amakba ya "war crimes" den sako lir ta UN ketdangsür temi tekumdangtsü ashi.

Taoba hopta Israel-i Beirut south tsütsü bomb poklokja Hezbollah indang mitkar tanishir Haytham Ali Tabtabai tepsetba sülen tensa tali tamajungba akum.

Iba telok ya taoba küm raraba sülen tang tashi tashi mait lir, aser parnoki ano telangzüba magütsü.

Hezbollah telok indang nok-nü yutsütsüsa Lebanon-i peria meinyaker ta Israel-i Lebanon dak tai tongloktsür, koba Lebanon sorkari magizüker.

Israel-i maneni amakba ajanga Lebanon nung alirtemi Israel mitkari tayimtsü amshia

amakba ano ulushitsü südi ta tsüboteper.

Külen Hezbollah-i ashiba agi, Israel-i Lebanon litsü nung amakba manen tashi aser linük south tsütsü tesem pongu amokbanga ali tashi nok-nü yutsütsü memulunger.

Jakarta kitsük-kirong lendong nung nisung 22 asü

Jakarta, Luchii/December 09 (Agencies): Indonesia yimtiba Jakarta nung Mongulbarnü storey tenet ki ka nung mi adoka nisung 22 asü.

Osang ajanga ashiba agi, firefighters temi ghonda ishika inyakba sülen mi remseptetogo. Ketdangsür temi iba mi tenzükba indang jangjatsü asoshi inyakteper.

Mi remseptetogo aser ki telung nung ano iba timtem ajurur alirtem bushitsü meranger, ta Central Jakarta police tekolakba Susatyo Purnomo Condro-i ashi.

Mi ya anüngdang teroto meta mezüngbuba floor nung tenzüker aser temalen aliba floors nung kaoloka ao, ta Condro-i ashi. Mapa inyaker kar iba ki nung chiyonga liasü aser kar office-i orr liasü, ta pai ashi.

"Tang onoki timtem ajuru alirtem anizüktsü aser mi

KIBONG KÜMER KÜM 50 AJUNGER



Mr. Punanükshi Longkümer & Mrs. Meyilemla Jamir

"Kibubai onok asoshi mapa tulu inyak; onok pelaa lir"
Tenüngsang Ken 126:3

Tsüngremi ozü tsürapur kibong kümer Hon Jubilee mong tongtetsüsa takum arishi anema toktsüba asoshi Tsüngrem tenüng asanger. Nüna takum libaliru jenjang ajanga onok tali ajungmesor aser onok mulung temeim nung moshia lidaktsür. Ano maneni onok akümdong süa alitsü asoshi nüna anema aliba aser arishi talang moajang ta onoki sarasademtsür.

Temeim Chinurtem, Anükapang aser Semchirtem

KIBONG KÜMER KÜM 50 AJUNGER

10.12.1975 - 10-12-2025



Mr. Chubatemjen Pongen & Mrs. Yashirenla Longkumer

Tsüngrem taochi aser temein tulu ajanga onoki teti meima aser aküm tsübuu aliba temeim Obala aser Ojala kibong kümer küm 50th tashi anema aliba aser arishi moatsüba asoshi Tsüngrem tenüng asanger. Taküm nung tiya tensa palala ajurua jaja arudang nüna tamang sarasadem aser shisatsü agi onok kümzüka, moaja anitetba asoshi tenüngsang agütsür. Ano maneni, onok akümdong süa alitsü Tsüngremer tatenba meshia sarasademtsür.

~ Chirmur, Anakapang, Amolatem aser Semchirtem.

asü. Hong Kong ketdangsür temi bushisüngdangba nung item ki yanglushiba mapang meyibangba scaffolding ya fire-safety codes nung aliba ama masü ta bushitet.

Iba ki nungya Terra Drone Indonesia indang office lir, koba ajanga aerial survey atema drones agütsür, aser iba service ya mining aser aluyimba mapa inyaker temi agir.

Iba company ya Japanese drone firm Terra Drone Corporation indang Indonesian unit lir.

Kompas TV ajanga video prokshiba nung firefighter temi ki telung nungi nisung anizüktsü merangba aser nisung kar ki telung nungi nisung tasü mang asepa juli bener aluba nguogo. Mapa inyaker kar floors temalen nungi 'portable ladders' amshia ajenba nguogo.

Tawa Hong Kong nunga ki talang atongtepa süa aliba tenet nung kitsük-kirong lendong ataloka nisung 160

November 26 kitsük-kirong ya jungjunga remseptsü anogo ana agia liasü, koba Wang Fuk Court complex nung ki ka nung sungkum indang scaffolding meyibanga aliba netting nungi tenzüker.

Iba sülen windows tema nung inoka aliba foam panels nung mi kaoloka mopung agi milak ya danga building tem nung oa jangruloka ki tulu ti aliba nungi tenet rongdok.

Wang Fuk Court ya 1983 küm renemba affordable housing complex lir, koba units 1,984 nung kibong 4,000 shi alir. Mi jangruba mapang building ti prongla yanglushiba maparen nung shilem ka ama 'green mesh' aser scaffolding agi meyibanga liasü.

Messi agizüktsü atema Kolkata yimti renemer



Messi agizüktsü renemshiba maparen ka nung Kolkata yimti nung Lionel Messi sabur kati Argentina-pur sentsü par ki rangben sentsü inokba noksa angur.

Luchii/December 9, 2025

(Agencies): Messi indang GOAT India Tour December 13 nü Kolkata nungi tenzüksü lia yimti nung aliba nüburtem kanga yongyatepa atadar.

Lionel Messi-i iba tour ya Kolkata nung tenzüksütsü aser iba sülen Hyderabad, Mumbai aser Delhi nungeri aotsü. Shah Rukh Khan shiba Messi indang fan ka lir, pa Kolkata sentong nung adentsü imlar.

Iba sentong atema ticket aika yokatokogo aser Salt Lake Stadium counters nung anepdang nungi nüburtem tarensena atatepdar, kong iba

sentong agitsü. Gen Z fan tem parnok indang ticket bener noksa tangokba nguogo aser item noksatem Instagram sünga prokshidar. Counter tem temeket nung nüburtem pelatepba ajanga Messi den ajurutepotsü atema nüburtem kanga yongtapetba sayur.

Delivery worker Rajib Roy-i pa indang ticket amer News18 dang ashiba agi, "iba ya kü pungmang atalokba ka lir. Ni Messi ticket angutsü atema aonung aser anüngdang kanga meranga inyakogo. Tatem nung kü pungmang atalokogo. Iba sen entokba atema mesasar. Messi

ya kü tsüngrem lir," ta pai ashi. Ticket sen ya 4000 dak tema lir.

Arishi küm 70 nungi Gen Z tashi fan tem ticket alitsü atema atatepdar. Ticket ya sen 4000 agi tenzüker aser VVIP ticket bo sen 25,000 shi lir.

Ticket ayokba den külemi stadium kima merchandise tema kanga junga yokdar. Messi T-shirts ayokba tantsür kati ashiba agi, "football tsüngrem Messi arutsü lir. Nüburtemi arua item T-shirts tem alir. Ni item ya sen 300 agi ayoker. T-shirts dang masü saka nenoki Messi bands, headbands ajak idaki angutsü.

Shakib-i asaya nungi manen tsüngda Bangladesh-i meyipa oa asayaner



Luchii/December 9, 2025

(Agencies): Taoba mapang Bangladesh team captain Shakib Al Hasan-i, pa international career formally metembang tsüngda kidangi meyipa oa format asemprongla asayatsü imlaba lemsatepogo. Arishi küm 38 tain asayar yagi ashiba agi, pa international cricket asaya format ajak nungi formally-bo maneni lir.

"Ni format ajak nungi officially-bo maneni lir," ta Shakib-i Beard Before Wicket podcast nung ashi.

"Tang mezüngbuba ni iba ya

lemsateptsü. Kü nükjidongji Bangladesh-i meyipa oa ODI, test, aser T20 ta asayamung ka asayaba sülen asaya nungi anisüngzükner," ta pai ashi.

Sheikh Hasina-i aniba sorkar atsüngtokba sülen Shakib ya taoba küm linük toktsür ao. Pa ya Hasina-i aniba Awami League sorkar kübok parliament züngsem ka liasü.

"Ni asayamung ka nung dang format ajak nungi anentettsü. Ni format ajak asayaba asayamung ka asayaba sülen asaya nungi anisüngzükner," ta pai ashi.

India den taoba küm pa

indang career nung Test 71buba asayaba sülen pa tang tashi international jenjang nung asaya ka danga asaya mali. Iba sülen pai pa T20 Internationals nungi anisüngzükba sangdonga liasü.

Shakib-i, kidang South Africa den Test asayaba mapang tatembangbuba asayatsü mepeshi, saka interim sorkari pa yimden yimsüsüba dak sendakba nung tekümsükba kübok toktsütsü ta kuli magütsütettsü ta ashiba sülen masayai liasü.

Left-arm spinner yagi ashiba agi, pa Bangladesh nungi tanaben asayatsü timla nung linük balala nung franchise cricket asaya arudar. "ni timla akar. Ibayongji ni asayadar (T20 leagues). Ataloktsü imlar," ta pai ashi.

Shakib-isa, pa kanga belematokba ajanga English County Championship nung Surrey nungi asayaba mapang asa chuck süa ball aon aser iba ajanga pa nem tenokdangba agüja liasü.

Shakib nem England and Wales Cricket Board (ECB)-i ayongzükba asayamung nung ball maontsü atema tenokdangba agütsür lir.

IND vs SL: India tetsür T20I squad sangdongogo

Luchii/December 9, 2025

(Agencies): India tetsür team Sri Lanka den T20I asayamung ka nung asaya pongu asayatsü lia Gunalan Kamalini aser Vaishnavi Sharma na tang mezüngbuba international jenjang nung asayatsü atema shimogo.

Iba asayamung ya India nung December 21 nungi 30 tashi asayatsü. Visakhapatnam nung mezüngbuba asaya ana asayatsü aser Thiruvananthapuram nung tanungba asaya asem asayatsü.

Arishi küm 17 tain wicketkeeper-batter Kamalini-i Women's Premier League nung Mumbai Indians nungi asaya teku nung asayar lir.

Ajisüaka arishi küm 19 tain Vaishnavi ya WPL auction nung densema maliasü.

Asayar tasen ana yagi Radha Yadav aser Uma Chhetri na melenogo, shirnok taoba ita ODI World Cup akokba team nung densema liasü.

Team ya maneni

Harmanpreet Kaur lenisüba nung asayatsü aser Smriti Mandhana vice-captain asütsü.

Australia den World Cup semifinal nung Pratika Rawal melenba sülen Shafali Verma-a team nung züngoksemogo.

Iba T20I asayamung ya WPL 2026 January 9 nü nungi tenzüka Navi Mumbai nung asayatsü lia asayatsü.

December ita Bangladesh den white-ball asayamung ka asayatsü aliba thinenba sülen iba asayamung asayatsü sangdongogo.

India aser Sri Lanka na T20I tatemsa 2024 küm October ita World Cup nung asaya liasü.

Sri Lanka den asayamung atema India T20 squad:

Harmanpreet Kaur (C), Smriti Mandhana (VC), Deepti Sharma, Sneha Rana, Jemimah Rodrigues, Shafali Verma, Harleen Deol, Amanjot Kaur, Arundhati Reddy, Kranti Gaud, Renuka Singh Thakur, Richa Ghosh (WK), G Kamalini (WK), Sree Charani, Vaishnavi Sharma.

England fast bowler Wood Ashes asayamung ojang dang asayatsü



asayatsü atema ita aika meranga inyakba sülena kü temekok tajungba makümer.

"Onok shingaia iba ya imla maliasü. Ni teyari tulu agütsütsü timla nung idaki aru. Injection timba agia medical treatment kanga sashia agiaka kü temekok nung timtem ya imlaba dang nungi tamajungba ta ngutetogo aser iba atema ni kanga tezü adanger," ta pai ashi.

Ajisüaka pai ashiba agi, pa temang anepalua tanaben asayashitsü merangtsü.

"Kechi atalokdir atalokaka ni meyipa arua asayatsü asoshi maneni meranga inyaktsü," ta Wood-i ashi. "Ita ishika timtema aruogo, saka ni tanaben merandangtsü asoshi temulungtetba tulu lir," ta pai ashi.

Pa masayatettsüsa akümba ya England team atema takoksa tulu kechiyong parnok asaya ana nungbo tamakok nguatokogo.

Wood ya England nunger bowler tem rongnung ball takaratiba aonba bowler ka lir. Pa 2015 küm mezüngbuba asayaba sülen Test 38 nung wicket 119 agir lir.

Pa ya 2015 küm Ashes akokba team aser 2019 küm ODI World Cup akokba England team nung densema liasü. 2022 küm T20 World Cup akokba team nunga pa densema liasü.

"Surgery agiba den Test

BILEMDANGANG

"Temeim agi ajak kokteter."